



Republika e Kosovës
Republika Kosova
Republic of Kosovo



Komuna e Kaçanikut
Opština Kačanik
Municipal of Kačanik

01Nr.60/01-4155/23
Kaçanik, 27.02.2023

PROCESVERBAL

Nga mbledhja e **II (dytë)** e rregullt e Kuvendit të Komunës Kaçanik për vitin 2023 (Legjislatura e shtatë), mbajtur me 27 shkurt 2023. Mbledhja u mbajt në katin e tretë të objektit të komunës, në sallën e kuvendit, më fillim pune në ora 11:00.

Nga përbërja e përgjithshme e Kuvendit të Komunës prej 27 anëtarëve, pjesëmarrës në mbledhje ishin 27 – të gjithë.

Nga Ekzekutivit i Komunës, në mbledhje morën pjesë: Kryetari i Komunës-Besim Ilazi, Nënkryetari i Komunës- Sabedin Vishi, Drejtorët e drejtorive: Bahri Selimi-DBF, Sali Malsiu-DSHMS, Ramadush Osmani-DSHPE, Qamil Stagova- DUKMM, Suhad Dullovi- DBPZHR, Dardana Tafili-Dauti- DAP, Pranvera Loku-Zharku- DZHET, Hafize Sallahu-DKRS, ndërkaq nga zyrtarët e komunës në kuadër të detyrave të punës ishin: Fatlume Guri –Selimi, Bejtulla Dalloshi, Hidajete Guri, Shefket Koxha, Mavije Murseli.

Nga strukturat vendore mbledhja monitorohet përmes Teleprezencës nga Gëzim Sahiti- zyrtar i lartë për monitorim të komunave në MAPL.

Mbledhjen e kryesoj, Kemal Murseli- Kryesues i Kuvendit
Procesmbajtës, Makfire Malsiu.

Kryesuesi i Kuvendit z. Kemal Murseli: Të nderuar pjesëmarrës, së pari iu përshëndes të gjithëve, iu dëshiroj mirëseardhje, konstatoj kuorumin, të gjithë janë prezentë, kushte pune për mbajtjen e mbledhjes ka, e hapi mbledhjen e II (dytë) të rregullt të Kuvendit të Komunës për vitin 2023, data 27 shkurt, me këtë:

REND PUNE

1. Aprovimi i Procesverbalit nga mbledhja e kaluar e Kuvendit të Komunës;
2. Raporti i Ekzekutivit të Komunës për vitin 2022;
3. Raporti Vjetor Financiar për periudhën, Janar-Dhjetor 2022;
4. Informatë për përfundimin e Gjysmë vjetorit të Parë të Vitit shkollor 2022/2023;
5. Informatë për menaxhimin e burimeve njerëzore për periudhën Janar-Dhjetor 2022;
6. Raporti i punës i Komitetit për Politikë dhe Financa për vitin 2022;
7. Raporti vjetor lidhur me auditimet e brendshme të kryera dhe aktivitetet e Auditimit të Brendshëm për vitin 2022;
8. Propozim Vendimi për subvencionim të fermerëve;
9. Propozim Vendim për subvencionim të OJQ-ve në fushën e Kulturës, Rinisë dhe Sportit.

Fillimisht iu njoftoj lidhur me Deklarimin e pasurisë. Nga data 01-31 mars 2023 duhet të deklaroni pasurinë, ndërkaq është hera e fundit që anëtarët e KK e deklarojnë pasurinë, për shkak të ndryshimit të ligjit. Kjo ishte kërkesë nga Kolegjiumi i kryesuesve të KK, që anëtarët e Kuvendit të Komunës të lirohen nga deklarimi i pasurisë, për shkak të kompetencave që kanë, se nuk lidhen direkt me çështje të korrupsionit. Jeni të vetëdijshëm për pasojat ligjore që na presin nëse nuk e deklarojmë pasurinë, kështu që të keni parasysh çështjen e deklarimit të pasurisë në afatin e përcaktuar ligjor.

Për shkak të volumit të materialit, kërkoj që diskutimet kur t'i bëni, mos i ndërhyjni njëri tjetrit, që mos të krijojmë debat interaktiv mes dy personave, por t'i përmbahemi rregullores. Lidhur me rendin e propozuar të punës, e hapi diskutim: Për diskutim nuk u paraqit kush, atëherë, Rendi e punës e shtroj në votim për aprovim dhe i njëjti u aprovua njëzëri. Në sajë të kësaj del konstatimi së Kuvendi i Komunës,

APROVOJ

Rendi e punës në përbërje prej 9 pikave.

U kalua në shqyrtimin e pikëve sipas renditjes:

1. Aprovimi i Procesverbalit nga mbledhja e Kuvendit të Komunës;

Procesverbali i mbledhjes së kaluar të KK u aprovua njëzëri pa vërejtje. Në sajë të kësaj del konstatimi së Kuvendi i Komunës,

APROVOJ

Procesverbalin e mbledhjes së I (parë) të Rregullt të Kuvendit të Komunës Kaçanik, 31.01.2023 të datës 01Nr.60/01-2121/23.

Kryesuesi i Kuvendit: Kalojmë në pozicionin e Pyetjeve dhe Kërkesave:

Pyetje dhe Kërkesa

z. Agim Mani: Unë nuk kam pyetje apo kërkesë, por kam një Ankesë lidhur me një pyetje të cilën e kam ngritur në muajin tetor, për të cilën nuk kam marrë përgjigje, e cila përgjigje po t'me ishte dhënë, na kishte shërbyer sot në këtë mbledhje.

z. Naim Beça: 1. Kërkoj nga organet përkatëse komunale të vendosë mbrojtëse për vetura në rrugë të rrezikshme, që mos të ndodhë aksident me fatalitet. Në vazhdim z. Beça i potencoj aksidentet e ndodhura kohëve të fundit në rrugë të rrezikshme (Llanishtë) me të lënduar të 3-4 persona, në mesin e të cilëve edhe një familjar.

2. Pyetje e dytë është për drejtorin e DSHMS: Ku është arsyeja që vetëm deri në ora 15:00 veturat parkohen në parkingun e ambulancës, ndërkaq me ka rastisur me i parë vetura që vijnë nga terreni pas orës 15:00 ndalen me larg nga ambulanca, paguajnë parking me para, shpesh edhe dënohen në mungesë parkingu. Këtë nuk e kuptoj, kur dihet se ambulanca punon deri në ora 20:00, ndërkaq parkingu mbyllet në ora 15:00.

znj. Kadrije Lika-Troni: Pajtohem me ankesën e kolegut Agim Mani. Unë në mbledhjen e kaluar kryetarit iu kam drejtuar me një pyetje, kaluan një muaj dhe nuk kam përgjigje.

1. E kam një pyetje për drejtorin e DSHPE: Mungesa e ngadalësuesve të shpejtësisë në afërsi të shkollave, mungesa e sinjalizuesve horizontal dhe vertikal në afërsi të shkollave, trotuari i shndërruar në formë parkingu dhe dalja direkt në rrugë e nxënësve nga shkolla të SHF "Emin Duraku" në Kaçanik, cenon lirinë dhe sigurinë e fëmijëve dhe kjo mbetet ende problem në komunën tonë. Nëse mundesh drejtor me na shpjeguar: A janë të pajisura të gjitha rrugët në afërsi të shkollave me sinjalizues ?

z. Betim Shala: Pyetje për Kryetarin e Komunës: A ka diçka lidhur me nënkalimin prej rrugës "Skënderbeu" deri të "ETC" të pjesa ku kalojnë fëmijët me shkuar në shkollë ?

z. Agim Çaka: Në këtë mbledhje do t'i paraqes disa çështje të cilat janë në interes të qytetarëve:

1. Ndriçimi publik, nuk është funksional në pjesën me të madhe të qytetit, me saktësisht, të Kalaja, të Ura e Konakut dhe një pjesë të rrugës së Rakocit deri të lagjja Lika.

2. Të projekti i ndërtimit të hekurudhës, ka ankesa të qytetarëve, sepse gjatë punimit të hekurudhës është ngushtuar rruga, me çka është vështirësuar kalimi me makina. Janë vendosur disa mbrojtëse të betonit të cilat mendoj se janë jashtë standardeve të mbrojtjes së rrugës dhe

të këmbësorëve që kalojnë atypari. Makinat duke ia lëshuar rrugën njëra tjetrën, ka rrezik me përfunduar në hekurudhë. A do të ketë mbikalime apo nënkalime në dy pozicione të hekurudhës, të Kalaja dhe të pjesa e rrugës që vazhdon për të shkolla?

3. Po flitet për dështimin e projektit të asfaltimit të rrugës: Runjevë-Stagovë. Sa është e vërtetë kjo, në mënyrë që t'i informojmë qytetarët se ku qëndron problemi, i qeverisë apo i nivelit lokal?

4. Lidhur me rastin e tërmetit i cili ndodhë para do ditëve në Turqi: Cilat janë mundësitë që komuna me ndihmuar në këtë drejtim? Një donacion simbolik kishte me qenë i mirëpritur për të gjitha ata që kanë përjetuar këtë ngjarje në njerëz dhe dëme materiale.

z. Ekrem Livoreka: Kam një kërkesë për DSHPE, Ramadush Osmani: Me kërkesë të banorëve të fshatrave; Gajre-Ivajë-Strazhë, në hyrje të rrugës, Gajre, kërkoj të vendoset një shenjë orientuese me emrat e fshatrave, për me bërë orientimin e qytetarëve me të lehtë në atë pjesë.

Kryesuesi i Kuvendit: Pyetje dhe kërkesa tjera nuk ka, atëherë kalojmë në pikën vijuese:

2. Raporti i Ekzekutivit të Komunës për vitin 2022;

Kryesuesi i Kuvendit: E hapi diskutimin:

z. Adnan Reka: Sa i përket Raportit të Ekzekutivit të Komunës për vitin 2022, ne konsiderojmë se është i pasaktë, jo transparent dhe jo llogaridhënës. Pse i pasaktë? Në fillim të raportit të Qendra komunale për shërbime me qytetarë, tabela të cilin ju e prezantoni është plotësisht e pasaktë, ju thoni: “Gjatë vitit 2022, në sektorin e Shërbimit me qytetarë janë pranuar, proceduar dhe përfunduar 33961 lëndë”, ndërsa ne themi është gabim në bazë të shifrave që ju i prezantoni në të njëjtin tabelë, sepse po t'i mbledhim me saktësi dalin 33675 lëndë, dhe jo vetëm kjo pasaktësi, të gjitha shifrat për secilën drejtori veç e veç janë të pasakta, pra raporti është i pasaktë. Jo transparent -mungesa e numrave të fletëve (faqeve) në një raport njëvjeçar kaq voluminoz të ekzekutivit, e bënë jo transparent dhe vështirë me komentua raportin. Dy, shumicës së Drejtorive komunale ju mungojnë shumat (kostot) e projekteve të realizuara. Dhe tre, pjesa e tabela nga Zyra e prokurimit është e deformuar apo në radhitje e çrregulluar me, emërtimin e projektit, vlerën e parashikuar me buxhet dhe vlerën e kontraktuar të projektit. Jo llogaridhënës -si mund të jepni llogari para publikut kur jeni të pasaktë dhe jo transparent, pra si mund të diskutojmë dhe t'i besojmë një raportit që është kaq jo transparent dhe i pa saktë. Kolegë të nderuar, për të vërtetuar këtë, ne kemi edhe fakte tjera. Si është e mundur që Kontrata e njëjtë për mirëmbajtjen verore dhe dimërore të rrugëve lokale të na dalë me çmime të ndryshme në 3 raporte të ndryshme. Në Raportin e Ekzekutivit del 201,425 €, në Raportin vjetor financiar 212,263€, ndërsa në Raportin nëntë mujor financiar na del më shtrenjtë se në raportin vjetor, pra na del shuma 226,910 €, ju lutem më thoni si është e mundur kjo. Ja edhe një fakt tjetër, bazuar në pjesën e raportit të DKA-së transporti i nxënësve kushton 8,000€ në muaj, dhe unë po them shumëzuar për 10 muaj që nuk janë, por hajde të themi se janë, kushtojnë 80,000 € në vit, ndërsa në pjesën e raportit të prokurimit e kemi vlerën e parashikuar të kontratave për transportin e nxënësve 209,480€, ndërsa vlerën e kontratave së bashku e kemi 182,682 €, do të thotë, më tepër se 100.000 € më shtrenjtë. Si është e mundur kjo?

Dhe për fund, e kam edhe një pyetje për Ekzekutivin, kushdo që mund t'me tregojë, ku gjendet Strehimorja nëntokësore në Gjimnazin “Skënderbeu”, sepse kam pyetur shumë njerëz që mund ta dinë, por askush nuk e dinte.

z. Agim Mani: Do të mundohem me bërë një përmbledhje tjetër në krahasim me më atë që e bëri kolegu im. Janë të vërteta këto që i tha kolegu, ndërkaq në këtë Raport të Ekzekutivit ka diskriminim, si të ndriçimi publik, buxheti total i komunës 30% ka shkuar në Kaçanik të Vjetër. Në këtë rast ka fshatra e lagje të cilat nuk kanë fare ndriçim publik, ndërkaq në Kaçanik të Vjetër është kryer edhe faza e tretë. Të ndriçimi publik e pashë edhe një shkrim, ku Ekzekutivi i komunës ka lëshuar pëlqim dhe mburret me atë që disa lagje e fshatra vetëfinancojnë

ndriçimin publik. Kjo i bien se qytetarët e kanë humbur shpresën të komuna, ndërkaq komuna edhe pse e ka buxhetin, mjetet po i kthen prapa. Drejtori i ka dhënë statistika, por nuk ka dhënë statistika sa metra katror asfalt janë asfaltuar dhe në cilat projekte rrugore. Për këtë kërkoj nga DUKMM me na dhënë tani informata me emër, sa sipërfaqe me asfalt janë shtruar në secilin projekt rrugor.

znj. Fitore Vishi: Marrë parasysh vështirësitë dhe problematikat, objektivat gjatë vitit që lamë pas, mund të konstatojmë se realizimi i objektivave që kishim në planin e punës së Ekzekutivit të komunës të vitit 2022 janë realizuar. Ne si grup parlamentar i PDK vlerësojmë për vitin që lamë pas, përkundër situatës emergjente, janë përmbushur objektivat investive dhe zhvillimore në komunën tonë. Jemi të vetëdijshëm se projektet tjera na presin, por me dinamikën dhe seriozitetin të cilin e kemi përpara, çdo objektivë do të përmbushim brenda dinamikës dhe afateve të caktuara ligjore.

z. Rrustem Zenuni: Lidhur me numrin e lëndëve që u potencua se janë llogaritur gabim, unë bëra përlllogaritje dhe shifrat me dalin të sakta. Me intereson të di, qysh e keni bërë llogaritjen që iu kanë dalë tjera shifra?

z. Adnan Reka: Llogaritja: lëndë të pranuar, $224 + 2940 + 12577 + 488 + 17446 = 33675$.

Të DZHT, 1 lëndë e pranuar, 12 në proces, 30 të miratuara, 5 të refuzuara, 2 të përfunduara = 52, ndërkaq numri i saktë është 50 lëndë.

znj. Dardana Tafili-Dauti: Nga raporti i cili është paraqitur nga Qendra komunale në shërbim me qytetarë, ekziston sistemi i intranetit, ku kemi edhe ne qasje në atë sistem. Në këtë kategori, nuk mund të shihen lëndët të cilat janë hedhur poshtë, pezulluar, refuzuar dhe anuluar, e që e japin shifrën 33961 lëndët e miratuara.

z. Adnan Reka: Unë nuk e di çka ka menduar drejtoreshë, unë po e shoh totalin e lëndëve. Unë i referohem të dhënave në raport të cilat i keni paraqitur, e që të dhënat nëse i mbledhim, totali nuk përputhet me shifrën e paraqitur në asnjë drejtori, ajo mund të jetë ashtu, por për ne me i paraqitur të dhënat kështu në raport, nuk ka kuptim.

znj. Dardana Tafili-Dauti: Kjo është argumentim, se unë qasjen të cilën e kam në intranet është kështu, ndërkaq me qasjen edhe të dhënave të zyrtarëve në shërbimet tjera, ne arrijmë me i ditur edhe kategoritë tjera.

Kryesuesi i Kuvendit: Ne flasim për të dhënat të cilat i shohim, se mund të jenë ashtu drejtoreshë, por ne iu referohemi të dhënave të paraqitura në raport.

z. Agim Çaka: Është e vërtetë se në tabela ka gabime dhe mospërputhshmëri në numra, kam vërejtje edhe të drejtoresha, se ne veprojmë në bazë të numrave. Kur të përpilohet një tabelë, shifrat duhet të përputhen në formë vertikale dhe horizontale. Kur jepet një e dhënë gabim, atëherë ai gabim përcjellët në krejt totalin e shumës, kështu që pajtohem me Adnanin lidhur me vërejtjet të cilat i theksoj.

znj. Ardita Rrahmani: Duke diskutuar këtë raport pune, shohim një diskrepancë të madhe në mes planit të aprovuar për vitin 2022 dhe këtij raporti. Duke e parë këtë raport, po ndërlidhem me një kërkesë të cilën nuk kam marrë përgjigje. Nuk është shënuar donacioni i EULEX për veturën e dhuruar QKMF, ndërkaq janë përfshirë donacionet tjera, përfshirë edhe do ampula. Pse po e fshihni këtë? Në plan është shënuar se, do të bëhet dezinfektimi dhe dezinsektimi dhe deratizimi, a është realizuar, sa ka kushtuar dhe ku është realizuar. Gjithashtu thuhet se është arritur një kontratë për shpërndarjen e disa pampersave nga një kompani. Unë në kontakt me ata të QKMF kam kuptuar se kjo nuk është realizuar.

z. Ramadush Osmani: Raporti është i hartuar goxha mirë, të mirëmbajtja e rrugëve dimërore dhe verore, e kam cekur situacionin për punët të cilat janë realizuar në vitin 2022. Prerjen buxhetore e sqaron drejtori i DBF, se kjo mund të dallon, se mund të paguhen edhe borgjet e

vitit të kaluar. Këto shuma të cilat i kam paraqitur, janë shifra të sakta për punët të cilat janë bërë në vitin 2022, ndërkaq pjesa tjetër që janë 12,000€ me tepër e sqaroj drejtori i financave se mund të jenë bërë prerje të ndryshme. Adnani pyeti, a ka strehimore të SHM "Skënderbeu", strehimore ka, mund të vizitoni, është nën SHM "Skënderbeu", është me të gjitha standarden që duhet t'i ketë një strehimore për numrin që e kemi cekur. Të ndriçimi publik, e kam cekur edhe në KPF, DSHPE prioritet i ka rrugët lokale dhe lokaliteti varësisht nga gjatësia e rrugës aq ka edhe investime. Në Kaçanik të Vjetër janë rrugët "Epopeja e UÇK dhe "Komandant Bardhi" dhe është faza e 3 se rruga Komandant Bardhi është vazhduar nga hekurudha në drejtim të Begracës, që është pjesë e prioriteteve të komunës për rrugët kryesore. Vetëfinancimi- është një formë që duhet të mburremi, këtë e praktikojmë se nuk mund të bëjmë investime në rrugë sekondare para atyre primare. Ka komunitet që shprehin gatishmërinë me kryer vet ndriçimin publik, pastaj drejtorja me marrë në menaxhim mirëmbajtjen mujore të ndriçimit publik, ku duhet bëhet një kërkesë, caktohen kriteret, del komisioni i verifikon se a është realizuar projekti në pajtim me kriteret e përcaktuara. Të pyetja, sa metra gjatësi rrugë janë asfaltuar, të dhënat janë në DUKMM.

z. Adnan Reka: Faleminderit për sqarimin për çështjen e strehimores. Unë nuk e kam ditur që ka strehimore, nëse mundesh me na treguar drejtor nga e ka hyrjen strehimorja? Sa i përket shumës 201,425 €, unë nuk ke di çka keni shpenzuar, ndërkaq raporti vjetor financiar thotë ndryshe, raporti 9 mujor financiar thotë ndryshe, bile raporti 9 mujor jep shumë me të madhe se raporti vjetor. Këto të dhëna janë në sh përputhje të madhe.

z. Agim Mani: Po me duket drejtor se i keni përzier kompetencat me DUKMM. Për trotuar ju i keni dhënë në raport shifrat, ndërkaq për rrugë, nuk kam parë askund në raportin e ekzekutivit. Pyetja ime është për DUKMM: Sa sipërfaqe rrugë janë shtruar në secilin projekt të asfaltimit të rrugëve ?

z. Ramadush Osmani: Hyrja e strehimores është nga pjesa e brendshme e gjimnazit, e ka daljen emergjente në formë të tunelit që del në oborr. Ne kemi dashur me qenë shumë transparent, se nuk ka nevojë shifra me potencuar në raportin e ekzekutivit, ato potencohen në raportin financiar, prerja buxhetore dallon, që mund të sqaroj drejtori. Trotualet, janë kodet dhe emërtimet e projekteve në secilën drejtori. E kam potencuar, ndërtimin e trotuarit në Gabrricë, Gërlicë, Stagovë, ndërkaq ndërtimi i rrugëve lokale në zonë urbane dhe rurale janë në DUKMM të cilat janë të prezantuara të kjo drejtori.

z. Agim Mani: Unë këtë pyetje nuk po e bëj sot e kam bërë para 2 muajve, përgjigje nuk kam marrë.

Kryesuesi i Kuvendit: Të dhënat për asfaltim të rrugëve në metër gjatësi janë në raportin financiar.

z. Agim Mani: Mos t'i përziejme çështjet me raportin financiar. Në Raportin financiar nuk është paraqitur sipërfaqja e rrugëve të asfaltuara.

z. Adnan Reka: Nëse ka mundësi drejtor (drejtorit të DA) me na dhënë sqarime të nevojshme lidhur me transportin e nxënësve ?

z. Zahir Doda: Raporti i ekzekutivi nëse krahasohet me raportin financiar, del diçka tjetër, shifrat dallojnë, se unë aty i kam sqaruar vetëm 2 pozicione. Shifrat 3,000€ dhe 5,000€ nuk munden me qenë ashtu të plota, por unë kam sqaruar vetëm për Voskopojen, 3,000€, se kjo ndryshon çdo muaj, mundet me qenë shuma 300-400€ plus minus. Unë e kam përmendur për transportin obligativ të nxënësve për shkollat të cilat janë mbyllur, ndërsa ka edhe shumë pagesa tjera që paraqiten të raporti financiar, p.sh. operatori i Gjilanit që bënë bartjen e nxënësve me nevoja të veçanta për Prizren, Prishtinë është kontrata të cilën nuk i di shumën. Subvencionimi i transportit në zona me të larta, Gllloboçicë, Strazhë, shuma rritet, kështu që nuk mund të krahasohen këto 2 raporte të punës mes veti.

z. Adnan Reka: Në raportin e prokurimit është paraqitur transporti i nxënësve 2022/2023, 100,000€, ndërkaq ju nuk jeni në dijeni, ndërkaq tani me arsyetuar diçka që nuk është paraqitur fare në raport, nuk e di sesa është e arsyeshme.

Kryesuesi i Kuvendit: Nuk duhet të nënvlerësoar arsyetimin e askujt, megjithatë drejtori u mundua me dhënë sqarime, nëse të intereson rrjedhja e parasë është e sqaruar në raport, drejtori është këtu për sqarime. Diskutime tjera nuk ka, atëherë konstatoj se Kuvendi i Komunës,

NJOFTOHET

Me Raportin e Ekzekutivit të Komunës për vitin 2022 / Lënda: 01Nr. 104/02-4102/23.

3. Raporti Vjetor Financiar për periudhën, Janar-Dhjetor 2022;

Kryesuesi i Kuvendit: E hapi diskutimin:

z. Agim Mani: Sipas këtij raporti, buxheti fillestar ka qenë 9,193,167.00€, ndërkaq buxheti final 9,994,256.43€. Fillimisht bëhet planifikimi, pastaj bëhet ndarja e mjeteve në kategori të caktuara buxhetore, në fund realizimi. Përveç granteve, planifikimi bëhet edhe për të hyrat vetanake komunale-HVK. Të HVK janë 8,975,661.04€ mirëpo planifikimi ka pësuar ndryshime janar-shtator me janar-dhjetor. Të HVK raporti vjetor ka ndryshim me raportin 9 mujor të TM1, TM 2 dhe TM 3. Planifikimi bëhet në fillim të vitit, por nuk mund të realizohet dhe ndryshohet për me ardhur në rregull përqindja e realizimit. Ka edhe gabime në kalkulim, të DSHPE, nuk duhet të jetë 3,500€, por 13,500€, të Kadastrit 132,000€, por duhet të jetë 130,266€, të Administrata nuk duhet të jetë 14,308€, por 11,350€. Të te hyrat indirekte të raporti vjetor nuk keni planifikuar fare, ndërkaq kanë qenë të planifikuara në raportin 9 mujor TM1, TM 2 dhe TM 3 61777€. Gjatë vitit 2022 janë realizuar 890,078€ të HVK, që është në rregull + bartja e mjeteve nga viti i kaluar, 1,596318€, të cilat mjete nuk kanë arritur të realizohen as 50%. A keni planifikuar bartje të mjeteve të vitit 2021 apo vetëm të vitit 2022, se keni planifikuar bartjen e mjeteve vetëm të atyre të vitit 2022. Të shpenzimet të MSH, fillimisht ka qenë një kontratë e cila është kontraktuar në vlerë 170,000€ dy vjeçare për mirëmbajtjen e nxehjes, druve, sigurisht se planifikimi ka qenë i keq, se është dashur në dhjetor 2022 me lidhur një kontratë tjetër, 190,000€. Kur të kalkulohet kjo kontratë, del se janë kontraktuar mbi 4000 metra kub dru. Kërkesat mund të rriten, por jo në shumën e caktuar. Të mirëmbajtja e rrugëve që e ceku edhe Adnani me herët, në raportin e ekzekutivit thuhet se janë 210,226€ në raportin 9 mujor, në raportin vjetor 212.000€. Ka edhe paqartësi tjera. Të raporti i realizimit të projekteve kapitale, bashkëfinancimi i projekteve, 80 mijë euro, në cilin projekt janë shpenzuar këto mjete. Të rregullimi dhe asfaltimi i rrugëve në pjesën urbane dhe rurale, janë mbi 294 mijë euro, ndërsa të shpenzimet kapitale thuhet se janë shpenzuar 450 mijë euro në rrugë lokale. Ku janë mjetet tjera të cilat ne nuk i shohim, nuk janë transparente. Po të bëjë këtë pyetje drejtor, se kësaj here, raporti ka qenë me ndryshe i hartuar dhe me i komplikuar me kuptuar. Të suficiti e kam bërë një pyetje në KPF dhe ju keni thënë se janë në suficit 93 mijë euro prej grantit, ndërkaq në këto tabela thuhet diçka tjetër, varianti është 1 milion e njëqind e tetëmbëdhjetë. Nga kjo hiqen të HVK të cilat mund të barten, ndërkaq mjetet tjera nuk mund të barten, dhe suficiti del 203 mijë euro.

znj. Ardita Rrahmani: Janë mbi 99,375€ nga Granti qeveritar dhe 121,341€ të hyrat direkte suficit buxhetor. LDK në raportin 9 mujor ka shprehë këtë shqetësim, dhe ky shqetësim po vërtetohet. Ku është arsyeja që po ndodhë kjo, a është nga mosdija apo pse po ndodhë?

z. Bashkim Luma: Unë në disa mbledhje kam bërë kërkesë lidhur me vlerën e projekteve në f. Gllloboqicë. Përgjigja e drejtorit ka qenë se vlerat do të paraqitën në raportin financiar, mirëpo edhe në këtë raport financiar, nuk është përfshirë vlera e projekteve. Cila është arsyeja ?

z. Bahri Selimi: U debatua për disa diferenca të buxhetit, realizimi raportit financiar dhe raportit të ekzekutivit. Raporti i ekzekutivit krahasohet me planin e ekzekutivit, e jo raportit të

ekzekutivit dhe realizimit të buxhetit, kjo është qasje gabim. Edhe Ardita shumë mirë e tha në fillim, raporti i ekzekutivit krahasohet me planin e ekzekutivit. Raporti financiar, nëse qytetari donë me ditur saktë se si është realizuar secili mjet i buxhetit, është raporti financiar, e elaboroj pak edhe drejtori i DA. Ajo që planifikohet në planin e ekzekutivit, shkon në terma, ndërsa në terma financiar në masë monetare është raporti financiar. Prokurimi i evidenton kontratat në raportin e vet, kontratat munden me u lidhur me shuma të mëdha, ndërkaq mundet gjatë vitit mos me u shpenzuar asnjë cent. Ndërsa, për pyetjet të cilat i bëri Agimi, se sa mjete janë shpenzuar për projekte të caktuara, etj., ishin pyetje me vend. Të planifikimi i të hyrave, Agim keni të drejtë se kemi pasur një gabim teknik, mirëpo në mes tremujor shit të dytë, tretë dhe këtij final, unë po të pyes sa kemi pasur planifikimin në total? Kemi pasur një ndryshim të kjo shifra 689.430€, ky është planifikimi vjetor final vjetor i të gjitha llojeve të HVK. Nëse ka pasur në mes të hyrave ndonjë dallim apo ndonjë korrigjim gjatë vitit, ajo lejohet. Përpos këtyre sqarimeve, po e shoh se ka nevojë me iu dërguar edhe sqarime tjera me email. Të krahasimi të MSH që bëre Agim, këto janë dru për nxehje, 190,206 i kemi shpenzuar në vitin 2022, 99,509 në vitin 2021, këtu hynë edhe shpenzimi me peletë, dihet se peleti ka lëvizur shumë çmimi nga ajo e kontraktuar në vitin 2022. Të bashkëfinancimi, 80.000€, shpenzimi ka shkuar për objektin e zjarrfikësve, në Kovaçec, objekt i ri i cili po ndërtohet tani. Të rrugët lokale, pjesa e parë e raportit financiar, nuk e kemi obligim me ua dërguar juve, e kemi dërguar si shtesë, për dallim nga ky raporti që e kemi dërguar në ministri- raporti standard. Të raporti standard, të rrugët të cilat i përmende, kategorizohen sa janë kanalizime, sa ujësjellës, trotuare, sa janë rrugë, ndërkaq të raporti detaj, janë rrugët e klasifikuara me emër. Nuk janë shpenzuar vetëm 240 mijë në rrugë lokale, ka me shumë, janë rrugë me emra dhe dalin si kategorizim aty rrugë lokale dhe rrugë urbane. Të pyetja e Arditës, të suficitit dhe të te HVK, unë kam përmendur të HVK nuk ka asnjë sqarim tjetër, edhe vitin e kaluar kur kemi pasur tejkalim të HVK kemi pasur për shkak të lejeve të ndërtimit. Sivjet nuk ka pasur ndonjë ndërtim të objekteve të reja banesore, nuk ka pasur ndonjë pagesë, zakonisht lejet e ndërtimit të objekteve të larta të banimit shkojnë deri në 100.000 €, kjo diferencë është për 120.000€ me pak inkasimi. Performancë të mirë kemi të tatimi në pronë, të lejet e ndërtimit nuk kemi sivjet sikur komunat tjera. Të suficitit, nuk e di a kemi arsye të flasim për suficit, duke ditur suficitin e nivelit qendror, ne jemi më mirë se çdo organizatë tjetër buxhetore, mundeni me kontaktuar me komunat tjera dhe me ditur suficitin buxhetor. Vit stagnues ka qenë, vit i inflacionit, vit i rënies ekonomike, dhe me gjitha ato projekte, kemi me arritur suficit vetëm 93.000€. Ngecje kemi pasur në 2 projekte, Çarshisë së qytetit, kjo për shkak të një shtylle të KEDS, dhe të projekti, Ndërtimi i objektit të ri për banim social, se kontrata është lidhur me 18 tetor, ka dështuar kontrata deri është lidhur 3 herë, për shkak të operatorëve, OSHP që funksionon në kuadër të qeverisë nuk ka funksionuar tërë vitin, e kështu me radhë. Të HVK janë diku 820.000€ të cilat kanë me u bartë në këtë vit dhe me i shpenzuar aty ku duhet. Të pyetja e Bashkimi, do të mundohem me ia dërguar të dhënat me email.

znj. Ardita Rrahmani: Unë jam anëtare e këtij kuvendi dhe flas për interesat e qytetarëve të kësaj komune, ndërkaq për interesa dhe suficit të komunave tjera, ata i kanë përfaqësuesit e tyre secila komunë, kështu që arsyetimi që u dha, nuk është në kompetencë të komunës tonë.

z. Rrustem Zenuni: Normale është me qenë brengosesh për suficitin e ngelur buxhetor, 93,000€ por ne duhet me bërë krahasime edhe me komunat tjera, se janë disa faktorë që kanë ndikuar, si mosfunksionimi i OSHP që lidhet direkt me kontratat që u përmend me herët nga drejtori. Nëse shikojmë komunën e Shtimes, ajo është me keq se ne, me suficit buxhetor, 1 milion e 400 mijë euro. Komuna jonë pavarësisht vështirësive financiare të cilat janë paraqitur, problemeve me OSHP, ka arritur mirë në shpenzimin e buxhetit, që mos të kemi shumë mjete të mbetura në suficit buxhetor.

z. Betim Shala: Unë i themi drejtorit të DBF se nuk ka nevojë me bërë krahasime me komunat tjera, se mundemi me bërë krahasime në mes të drejtorive të komunës tonë. Fjala vjen DBF i ka rritur të HVK në krahasim me vitin e kaluar, inspektorati i ka rritur të hyrat në krahasim me vitin e kaluar. Ndërkaq DSHPE e cila ka pasur me tepër punët në terren, i ka shpenzuar të gjitha

mjetet, kështu që krahasimi para se të bëhet me komunat tjera, të bëhet këtu në mes të drejtorive komunale.

z. Agim Mani: Të asfaltimi i rrugëve urbane dhe atyre rurale, kanë qenë dy projekte për të cilat janë kryer procedurat e prokurimit, 275.000€, shtuar me vonë edhe 10% që ka të drejtë dhe ka arritur 294.000€, kjo është e cekur në raportin financiar. Ndërkaq projekti tjetër, 124.615€, nuk e pash a ka përfunduar, a janë dhënë mjetet për tre rrugë: “Rabit Dullovi”, “Shaban Elezi”, “Regjep Luzha” dhe Ndërtimi i murit mbrojtës në Kovaçec, procedurat prokurimi i ka kryer me 20.09.2022, kontratat nuk janë bërë transparente, vendimin e kemi që kontrata është nënshkruar, mjete janë ndarë, ndërkaq çështja është se a janë shpenzuar ato mjete.

z. Bahri Selimi: Të gjitha mjetet që janë shpenzuar, janë paraqitur në raportin financiar, ndërkaq mos u bazoni në raportin e ekzekutivit, por në atë financiar për shpenzimin e mjeteve buxhetore.

z. Agim Mani: Në raport financiar nuk janë paraqitur këto shpenzime 124.615€.

z. Qamil Stagova: Desha me sqaruar për projektin 124.000€, është fjala për asfaltimin e një rruge në Biçec, një në Sllatinë dhe nuk janë paguar krejt mjetet, kanë me u paguar edhe 51.000€ që janë punë shtesë.

z. Adnan Reka: U diskutua shumë, por unë ende nuk e kuptova sa është suficiti buxhetor me gjithë sqarimet të cilat u dhanë. Ne po kërkojmë me ditur sa është suficiti i përgjithshëm buxhetor, e jo sa është suficiti vetëm për investime kapitale. E kemi të qartë drejtor se ju i bartni 814,622€, prej mjeteve 1,18985€ të cilat iu kanë mbetur pa realizuar. Nga këto mjete shuma e bartjes është 814,622€ nga vitet paraprake, këto rikthehen në buxhet, kjo është e qartë, ndërsa mbesin mbi 200,000€. A janë këto mjete suficit buxhetor?

Kryesuesi i Kuvendit: Drejtor të jemi të qartë për vlerën totale të suficitit buxhetor, duke ia hequr të HVK. A është e saktë vlera që u prezantuar 93.000€ e mjeteve në suficit buxhetor?

z. Bahri Selimi: Në raport gjithçka që është e shënuar është e saktë, është edhe shpalosja, kërkoj të lexoni edhe shpalosjen.

z. Adnan Reka: E kemi lexuar drejtor shpalosjen. Sipas neve, suficiti buxhetor është 203.973€, nuk po e kam të qartë se ju nuk po e thonë. Ju na thatë që raporti i ekzekutivit nuk duhet të krahasohet me raportin financiar, por raporti financiar me raportin financiar, a mund të krahasohet? Në raportin financiar të mirëmbajtja e rrugëve, muajin e 9 është shuma me e madhe sesa shuma në fund të vitit. Në muajin e nëntë është 226.910€, në fund të vitit është 212.262€.

z. Bashkim Luma: Nuk mora përgjigje në kërkesën time.

z. Ramadush Osmani: Lidhur me kërkesën e Bashkim Luma, ia dërgoj në email përgjigjen.

z. Bahri Selimi: Kam dhënë shumë shpalosje shtesë, është raporti standard, megjithatë edhe njëherë do të ua dërgoj me email. Nuk e kam me veti raportin nëntëmujor financiar, i bëjë krahasimet dhe ua kthej përgjigjen në email, se nëse kanë dalë me tepër mjete në raportin nëntëmujor financiar, është gabim. Raporti vjetor financiar paraqet gjendjen e fundit.

Kryesuesi i Kuvendit: Diskutime tjera nuk ka, atëherë konstatoj se Kuvendi i Komunës,

NJOFTOHET

Me Raportin Vjetor Financiar për periudhën, Janar-Dhjetor 2022 / Lënda: 01Nr. 05-400/01-4131/23.

4. Informatë për përfundimin e Gjysmëvjetorit të Parë të Vitit shkollor 2022/2023;

z. Adnan Reka: Sa i përket, Informatës për përfundimin e Gjysmëvjektorit të Parë të Vitit shkollor 2022/2023 si dokument, unë vërtet e pranoj se është dokument i qartë, i saktë dhe transparent, dhe jo vetëm kaq. Unë dua ta pranoj edhe publikisht se që nga prezantimi juaj i parë në legjislaturën e kaluar kur prezantuat Informatën e DKA-së të cilën ju nuk e përpiluat, por e trashëguat nga pararendësi juaj, patët thënë, ju citoj: “Me vjen keq që duhet të flasë për një dokument të cilin nuk e kam shkruar, por është i nënshkruar nga unë dhe më duhet ta pranoj, por, zotohem se kurrë më nuk do të shihni një dokument të tillë të nënshkruar nga unë” dhe ju vërtet e keni mbajtur fjalën, për çfarë ju përgëzoj. Përkundër kësaj, unë nuk pajtohem me politikat e Drejtorisë që udhëhiqni ju. Pse nuk pajtohem me politikat menagjeriale të drejtorisë tuaj? Sepse po të flasim për infrastrukturën shkollore, nuk është se duhet të ndjeheni komod, keni shkollën “Emin Duraku” në gjendje të mjerueshme, shkollën e Kovaçecit që ka filluar punën para 3 vitesh, por që asnjëherë nuk keni arritur ta përfundoj as rrjedhjen e çatisë e as ngrohjen ashtu si duhet për nxënës, për shkak të aferave korruptive që tanimë të gjithë i dinë për atë shkollë. Ju rrënuat institucionin e vetëm parashkollor në komunë, me kushte optimale për nevojat e komunitetit për të ndërtuar një institucion tjetër parashkollor, 50 metra nga objekti paraprak, pa oborr, me hyrje shumë më të vështirë për të realizuar qëllimet djallëzore të klanit. Nuk mund ta konsideroni sukses as personelin menaxherial të shkollave, keni drejtor të shkollave që i keni trashëguar dhe nuk keni mund t’i zëvendësoni, kanë pozitat e njëjta mbi një dekadë, keni drejtor tjerë me përkatësi plotësisht partiake, e në anën tjetër keni edhe shumë të tjerë që ushtrojnë detyrën e drejtorëve për vite me radhë. As cilësia në procesin mësimor nuk është më e mirë, nga viti 2018 kemi pasur rënie të vazhdueshme në cilësinë e arsimit. Kalueshmëria e nxënësve ndër vite në nivelin e arsimit të mesëm të ulët (VI –IX) ishte me sa vijon: në vitin 2016, 56.38%, në vitin 2017, 46.37% në vitin 2018, 52,70 %, 2019, 49,84 %, 2020 pandemi, 2021, 47,96 %, 2022, 43,48 % Meqë kemi përfundimin e Gjysmëvjektorit të Parë ne kemi krahasuar notën mesatare të nxënës nga klasa VI -IX me periudhën e njëjtë të vitit të kaluar, vitin e kaluar nota mesatare ishte 3.56, ndërsa këtë gjysmëvjektor është 3.53.

z. Agim Mani: Drejtorët e shkollave të cilët janë ushtrues detyre, kam një pyetje. Sa shkolla funksionojnë drejtorët me ushtrues detyre, dhe a kanë të drejtë me vite të jenë ushtrues detyre drejtorët e shkollave. Pse nuk hapet konkursi për drejtor të shkollave në ato shkolla që funksionojnë drejtorët me u.d., së kështu e parashih edhe ligji.

z. Bashkim Luma: Kur jemi të Informata e DA e këtij viti shkollor, po e ndërlidhi me 4 pika:

1. Sa i përket përgatitjeve për fillimin e vitit të ri shkollor 2022/2023, kjo drejtori ka planifikuar që në gjimnazin “Skënderbeu” të regjistrohen 256 nxënës, ndërkaq janë regjistruar 176 nxënës, një dallim prej 80 nxënës me pak të regjistruar. Në SHMP “ Feriz Guri dhe Vëllezërit Çaka”, 264 të planifikuar për regjistrim, ndërkaq janë regjistruar 160 nxënës, një diferencë shumë e theksuar në mes planifikimit dhe regjistrimit. Çka mundesh drejtor me na thënë për këtë diferencë në mes të planifikimit dhe regjistrimit?
2. Çështja e donacioneve të ndryshme. E di së në f. Gllloboçicë ka pasur një donacion disa kompjuter të dhuruar për shkollën e fshatit, ndërkaq në këtë dokument nuk është përmendur një donacion i tillë. Ku është arsyeja që nuk është evidentuar ky donacion?
3. Transporti i nxënësve, që sipas mendimit tim është një problematikë në veti, dhe një padrejtësi që iu bëhet nxënësve të komunës tonë, kryesisht atyre që janë pjesë e gjimnazit “Skënderbeu”, për shkak të mbështetjes jo të barabartë në raport me pjesën tjetër të nxënësve në kuadër të pagesës së transportit. Ju si ekzekutiv i komunës duhet të krijoni kushte të barabarta për të gjithë nxënësit të komunës, e më pastaj mund të krijoni kushte apo kritere tjera të cilat mund të llogaritni si strategji për regjistrim të nxënësve për njërin shkollë apo tjetrën e jo përmes konkurrencës së mirëfilltë, apo mundin e tyre. Nëse i krahasojmë mungesat me periudhën e njëjtë të vitit të kaluar, shohim se ka një diferencë bukur e madhe. Në vitin 2021 29875 mungesa gjithsej, 24.94 % e mungesave i takojnë 15390 mungesa janë të SHMP. Fillimin e vitit 2022/2023 kemi shifra të ndryshme, nga 26 mijë mungesa 14mijë janë të

gjimnazit "Skënderbeu", kurse 12 mijë janë të SHMP "Feriz Guri dhe Vëllezërit Çaka" është dallim i madh i mungesave krahasuar me vitin paraprak të SHMP të liruar komplet nga pagesa e udhëtimit. Një dështim sipas mendimit tim të lirit të pagesave të udhëtimit të nxënësve të kësaj shkolle. Kërkoj që në mbledhjen e radhës të vendoset që të lirohen nga shpenzimet e udhëtimit edhe nxënësit të cilët janë pjesë e gjimnazit "Skënderbeu".

4. Rezultatet jo të kënaqshme kur flasim për suksesin dhe mungesat të arsimtarëve dhe të nxënësve. Përgjegjës kryesor i mos suksesit për kundër trajnimeve të ndryshme që janë mbajtur për ngritjen e kualitetit.

Çështja e bursave, unë qysh në vitin e kaluar kam bërë kërkesë që të ndryshohet njëri nga kriteret e konkursit për bursat që i ndanë komuna. Si përgjigje ka qenë se kërkesa ime ka qenë shumë e arsyeshme, ndërkaq nuk është marrë parasysh kërkesa ime.

znj. Ardita Rrahmani: Marrë parasysh edhe nga kontakteve tona, e dimë se ka ushtrues detyre të drejtorëve në disa shkolla. Me intereson me ditur a keni marrë ndonjë veprim në këtë drejtim, sepse drejtorët e shkollave kanë të drejtë vetëm 6 muaj me ushtruar detyrën e drejtorit, ndërkaq ka drejtor që punon ushtrues detyre i drejtorit që dy vite.

z. Zahir Doda: E falënderoj Adnanin për informatën, pyetje nuk pati, por e bëri një përshkrim real, gjendja është e tillë, nuk kam as çka me hequr apo shtuar. Atë që e thatë ju, është faktike, kështu që jemi krejt në rregull. Reale është edhe gjendja e drejtorëve që punojnë u.d. disa janë me fajin tonë, disa pa fajin tonë, se është një procedurë për drejtorët që janë në pozita, sepse edhe ata të cilët i propozojmë me ua vazhduar mandatin, pa ardhur pëlqimi prej inspektorit të arsimit nuk mund t'ua vazhdojmë mandatin. Katër (4) drejtorë i kam u.d në pritje të rezultateve të inspektorëve të arsimit, ndërkaq në nivel regjional është vetëm një inspektor. Këtë sugjerim na i kanë dhënë edhe MASHT, në kontratë shkruhet i vazhdohet deri sa të vjen miratimi final nga inspektori i arsimit, se nuk ka të drejtë as kryetari i komunës me ia vazhduar kontratën pa ardhur miratimi final nga inspektori i arsimit. Për disa i kemi përsëritur konkurset, jeni dëshmitarë të asaj, në gjimnaz, ose nuk i plotësojnë kriteret ose nuk aplikon askush. Në çerdhe të fëmijëve, tri herë është anuluar konkursi se nuk ka pasur kandidatë. Për disa për u.d. kontrata bëhet për 6 muaj, mandej përsëritet edhe 1 herë në gjashtë muaj, kjo është duke ndodhur gjithkund në Kosovë. Të pyetjet që i parashtroj Bashkimi, realisht unë mundohem me bërë planifikimin në bazë të numrit të nxënësve që e përfundojnë klasën e 9-të dhe unë atë planifikim e marrë bazë, mirëpo pjesa e Gllloboçicës, gjysma vijnë të ne, gjysma shkojnë në Tetovë, pjesa e Doganaj, Elezaj, Bajnicë, Begracë, 90% e tyre shkojnë në shkollë të Ferizajt, 10% vijnë të ne, ndërkaq nga Hani i Elezit një pjesë e nxënësve vijnë te ne. Unë jam munduar me planifikuar mbi bazën e theksuar, ndërkaq na mungon realizimi. Unë nuk guxoj me bërë planifikim nën shifrën e nxënësve që kryejnë klasën e 9, se ia mohoj të drejtën e shkollimit dikujt. Këta janë faktorët, ndërkaq nuk është defekt i drejtorisë, por planifikimi nuk mund të realizohet. Të donacionet, regjistrohesh si inventar, nuk me ka ardhur si regjistrim gjatë kohës kur e kam bërë informatën, përndryshe e di, jam i njoftuar me atë pjesë. Për çdo donacion, pasi të bëhet regjistrimi zyrtar si donacion, paraqitet në informatë, përndryshe jam i njoftuar me ata kompjuterë që kanë ardhur donacion. Të transporti, është politikë në nivel vendi, edhe MASHT jep bursa për shkollë profesionale, për shkak se tregu po i kërkon. Çështja që kemi ndarë bursa për SHMP me shumë kemi pasur mesazhe pozitive sesa kundërshtime, duhet përfillet me tepër mendimi i shumicës. Nëse në kalkulimet tona mbërrihet sikurse për Gllloboçicë, të gjithë nxënësit subvencionohen me gjysmën e biletës, qoftë në gjimnaz apo shkollë tjetër, edhe për Strazhë, sepse janë pika të larta. Edhe rastet sociale, ua kemi paguar 100% shpenzimet e udhëtimit. Ndërsa të çështja e bursave të studentëve që iu kemi ndarë studentëve brenda Republikës së Kosovës, ne mendojmë se vendimi është i drejtë, mund të mos jetë i drejtë, ky është mendimi im. Për pyetjen e Ardites, u përgjigja me herët, ne po tentojmë me i zgjedhur drejtorët e shkollave, por me koeficientet e caktuar ka me qenë shumë vështirë me i zgjedhë, sepse nuk ka me pasur të interesuar me aplikuar me i marrë ato përgjegjësi me koeficient të caktuar.

z. Bashkim Luma: Donacioni ka qenë para disa muajve dhe nuk besoj se zgjatë aq shumë një regjistrim i tillë. Për çështjen e pagesës së transportit të atë që paguhet 100% për nxënësit e SHMP "Feriz Guri dhe Vëllezërit Çaka" pse mos të bëhet kjo edhe për nxënësit e SHM "Skënderbeu" në Kaçanik?

z. Naim Beça: I kam dy pyetje: 1. Drejtorët të cilët janë ushtrues detyre të drejtorëve të shkollave: A keni bërë ndonjë analizë lidhur me efikasitetin e punës së tyre? A janë efektiv dhe efikas dhe në kryerjen e detyrave u.d. të drejtorëve, si me qenë drejtorë të zgjedhur të shkollave?

2. Lidhur me konkurset e hapura për institucione arsimore, e potencove drejtor se nuk ka aplikuar askush të Çerdhja e fëmijëve QEAP "Agimi". Cila është arsyeja që nuk ka pasur kandidat aplikantë? Sa i përket koeficientit, vjet nuk ka qenë këta koeficiente. Cila është arsyeja që nuk kanë aplikuar kandidat për drejtor shkolle? Ndoshta është dobësi e drejtorisë, se nuk ka kush në botë i cili nuk ka dëshirë me u bërë drejtor. Është diku një arsye që nuk ka kandidat aplikonte, andaj duhet me u bërë njëfarë analizë që me i gjetur shkaktarët.

Kryesuesi i Kuvendit: Çështja është se nuk duan me marrë përgjegjësi shtesë për një diferencë të vogël të pagës, ky është mendimi im, janë rrethanat e arsye të ndryshme, nuk mund të marrim këtë si studim.

z. Zahir Doda: Analizë nuk kam bërë, por rënia e mungesave dhe suksesit, një muaj me vonë ia ka filluar mësimi, këto janë çrregullime në sistemin mësimor që mësimi ka filluar me 1 muaj vonesë dhe unë sot e sjellin informatën 2 muaj pas vitit të ri, kjo nuk donë koment. Analiza për drejtorë të shkollave që punojnë me ushtrues detyre nuk kam bërë.

Kryesuesi i Kuvendit: Diskutime të tjera nuk ka, atëherë konstatoj se kuvendi i Komunës
NJOFTOHET

Informatën për përfundimin e Gjysmëvjetorit të Parë të Vitit shkollor 2022/2023/ Lënda: 01Nr.04-610/01-3899/23.

Kryesuesi i Kuvendit: Kërkoj të bëhet pauzë, ndërkaq pas pauzës vazhdohet me pikët vijuese:

5. Informatë për menaxhimin e burimeve njerëzore për periudhën Janar-Dhjetor 2022;

Kryesuesi i Kuvendit: E hapi diskutimin:

z. Adnan Reka: Numri aktual i punëtorëve në vitin 2022 është 777. A duhet të jetë ky numër apo ky është numri me i vogël apo me i madh.

znj. Hidajete Guri: Sa i përket numrit të punësuarve me raport financiar është 777 punëtorë, i cili përfshinë, shëndetësinë, arsimin dhe administratë dhe zjarrfikësit. Sipas planifikimit buxhetor 2022, kemi numrin e lejuar për 804 punëtorë, mirëpo në fund të vitit është kjo shifër 777 punëtorë, me çka ndryshojnë se kemi zhvilluar një numër të konsiderueshëm të rekrutimit, por me arritur numrin e planifikuar 804, nuk kemi pasur mundësi për arsye të ndryshme, sepse gjatë vitit kemi pasur ndërprerje të marrëdhënies së punës, pensionime, përfundimit-skadimit të kontratave, sidomos në sektorin e arsimit, se shumë punëtorë punësohen me afat të caktuar, anulime të konkurseve, d.m.th. numri varion dhe asnjëherë nuk mundet me qenë shifra ashtu si e planifikojmë.

z. Adnan Reka: Nga numri i planifikuar 804 me atë ekzistues është 777 është 27 punëtorë, a është mundësi me u plotësuar kjo, por për arsye të ndryshme nuk mund të plotësohet?

znj. Hidajete Guri: Për arsye të ndryshme nuk ka mundësi me u plotësuar numri 804 punëtorë, kjo nuk mund të arrihet, për shkak se skadimi i kontratave mundet me u bërë brenda vitit dhe nuk bëhet përnjëherë. Ne mundemi me pasur në dhjetor skadim apo ndërprerje të kontratave për shkaqe të ndryshme, siç e potencova edhe me herët për shkak të pensionimit, ose dështojnë procedurat, ndërprerje të kontratave, anulim konkursi nga komisioni i ankesave apo të shumë

arsyeve tjera dhe nuk mundemi me mbërri numrin strikt të cilin e kemi planifikuar, ose shpallet ndonjë procedurë në fund të vitit dhe procedura vazhdon në vitin vijues. Në informatë janë të dhënat për të gjitha procedurat dhe nëse rritet numri i punëtorëve, atëherë rritet në janar të vitit vijues, nga 777 në janar 2023 janë shtuar 8 pozita. Duhet pasur të qartë se çështja e planifikimit nuk mund të arrihet asnjëherë strikt.

z. Adnan Reka: A ka një tolerancë plus minus, sa mund të jetë numri me i madh apo me i vogël nga ajo që planifikohet për të punësuarit brenda një viti.

znj. Hidajete Guri: Numri varion, mundem me paraparë sa pensionime janë brenda një viti, ndërkaq nuk mundem me paraparë për ndërprerje të marrëdhënies së punës me dëshirë, për të cilat duhet me zhvilluar procedura, pastaj kemi afatet ligjore për zhvillim të procedurave, 1 muaj është procedura e konkursit pastaj fillon aplikimi 15 ditë, kjo i bien 1 muaj e gjysmë, pastaj janë procedurat e selektimit etj. kemi raste kur në selektim na dështon procedura, në mungesë të dokumentacionit ose nuk kemi kandidat të mjaftueshëm, dhe duhet me u rishpallë konkursi dhe kjo merr kohë. Në vitin 2022 i kemi tejkaluar mundësitë që i kemi pasur, se ka pasur mundësi shifrat me qenë edhe me të vogla.

z. Adnan Reka: Atëherë sa po e kuptoj unë, nuk mundet me pasur limit sesa mundet me qenë numri nën atë që është planifikuar, mundet të jetë minus 50 apo 100. Të administrata janë 7 minus, të arsimit 4 minus, të shëndetësia 4 minus.

znj. Hidajete Guri: Të shëndetësia kanë dështuar vetëm 2 procedura nga komisioni i ankesave janë anuluar, ndërkaq janë plotësuar 7 pozita.

z. Adnan Reka: Numri aktual i punëtorëve të shëndetësia është 101, numri i planifikuar 105, në arsim numri i të punësuar 540, ndërkaq janë të punësuar 524.

Kryesuesi i Kuvendit: Janë çështje që varion brenda vitit, raporti bëhet për numrin që është në fund të vitit, pa llogaritur procedurat dhe çështjet tjera. Ky numër nuk mundet të kaloj shifrën e planifikuar, ndërsa nën atë shifër mundet varësisht nga mundësitë dhe çështjet të cilat rrjedhin gjatë vitit të çështja e kontratave. Të arsimit, drejtori është këtu dhe mundet me sqaruar numrin e të punësuarve.

z. Zahir Doda: Në arsim jemi të obliguar 3% të numrit të punëtorëve me lënë të lirë, përndryshe nuk mundem me i hequr nga lista punëtorin kur e zëvendëson dikush. Unë sa herë duhet me pasur 16 pozita të lira, se nëse bëhet një zëvendësim për pushim të lindjes, punëtori nuk hiqet nga lista e punësimit. Është mirë që asnjëherë nuk me ka mbetur jashtë liste asnjë punëtorë.

znj. Kadrije Lika-Troni: Pyetje për udhëheqësen e personelit: Cili është kriteri kryesor i lejimit të pushimit pa pagesë dhe deri në çfarë afati kohor lejohet pushimi pa pagesë i të punësuarit ?

znj. Hidajete Guri: Në bazë të kriterëve të përcaktuara për pushime, është e përcaktuar lejimi i pushimit pa pagesë, ndërkaq varet për cilat arsye kërkon. Në qoftë se punëtori i plotëson kriteret e përcaktuara në rregullore, atëherë i lejohet pushimi pa pagesë, nëse jo i refuzohet kërkesa.

Kryesuesi i Kuvendit: Diskutime tjera nuk ka, atëherë konstatoj se Kuvendi i Komunës

NJOFTOHET

Informatë për menaxhimin e burimeve njerëzore për periudhën Janar-Dhjetor 2022 / Lënda: 01Nr. 104/02-1781/23.

6. Raporti i punës i Komitetit për Politikë dhe Financa për vitin 2022;

Kryesuesi i Kuvendit: Raporti është hartuar nga zyrtarja e KK, ku është bërë përmbledhja e aktiviteteve të KPF. E hapi diskutimin: Për diskutim nuk u paraqit kush, atëherë e shtroj në votim për aprovim këtë pikë dhe u aprovua njëzëri. Prezentë 26. Në sajë të kësaj del konstatimi se Kuvendi i Komunës mori,

VENDIM

Me të cilin e Aprovoj Raportin e punës i Komitetit për Politikë dhe Financa për vitin 2022 / Lënda: 01Nr. 60/01-3910/22.

7. Raporti vjetor lidhur me auditimet e brendshme të kryera dhe aktivitetet e Auditimit të Brendshëm për vitin 2022;

Kryesuesi i Kuvendit: Kjo është një praktikë e re që po aplikohet për shkak të grantit të performancës. KK nuk ka obligim ligjor me aprovuar një raport të tillë, por po kërkoj ata që merren me grantin e performancës që raportet të diskutohen në KK. E hapi diskutimin:

z. Agim Mani: Në bazë të këtij raporti, nuk janë paraqitur mostrat që është obligim ligjor me planin e prokurimit, KRPP dhe AQF. Duhet të publikohen në faqen e komunës raporti i auditorit, për me ditur të dhënat, sepse nuk ka raport të publikuar. Ky raport i jep mundësi qytetarëve që për çdo vit me pa planin dhe punën, aktivitetet për gjatë një viti. Nuk e di a e dini që duhet publikuar raporti i auditimit, apo me qëllim nuk e publikoni. Ky auditim edhe pse ka gjetur të shkelura dhe i ka paraqitur në kategori të ndryshme dhe janë dhënë rekomandime, janë përcjellë menaxhmentit nga njësia e auditimit, ndërkaq shumica janë diskutuar në menaxhment, ndërkaq menaxhmenti nuk ka pasur ndonjë plan për zbatimin e tyre. Çka keni marrë ju për menaxhimin e rekomandimeve, sepse nuk mundesh me gjetur asnjë kontratë për me ditur qytetari lidhur me to. Për atë, shprehi shqetësimet për të dhënat që i paraqitni në raport financiar.

Kryesuesi i Kuvendit: Komuna ka 2 raporte të auditimit, atë të auditimit të brendshëm dhe atë të auditimit të jashtëm. Raporti i zyrës kombëtare të auditimit është publik për qytetarët, sepse është një vlerësim i jashtëm. Zyra e auditimit të brendshëm funksionon në kuadër të zyrës kryetarit të komunës, e cila zyre duhet të njoftoj kryetarin me rrjedhjen e njësishë organizative-komunës, me shkeljet të cilat ndodhin, që komuna të merr masa. Kjo është një kontroll e kryetarit ndaj organizatës, që kryetari të marr masa ndaj atyre shkeljeve. Raporti i auditimit të jashtëm, është një vlerësim i jashtëm i auditimit për të gjeturat e komunës, i cili raport debatohet në KK dhe bëhet plani për zbatimin e rekomandimeve sipas gjetjeve të auditorit. Raporti i auditimit të brendshëm është kryesisht për kryetarin, mirëpo pasi po kërkohet të debatohet edhe në KK, atëherë ne debatojmë për këtë çështje. Raporti i auditimit të jashtëm është ai që ne duhet t'i besojmë me tepër, po flas si anëtar i KK se ky raport i përket me tepër ekzekutivit të komunës, është edhe komiteti i Auditimit, e kam fjalën që mos të ndërlidhim raportin e auditimit të brendshëm me atë të jashtëm, ndërkaq është mirë që të gjeturat në këto 2 raporte të përputhen, që mos të del çështja se auditori i brendshëm nuk i paska vërejtur ato të gjetura. Besoj njësia e auditimit të brendshëm është duke e kryer punën si duhet, është duke e njoftuar kryetarin me të gjeturat brenda organizatës buxhetore dhe kryetari merr masa për të gjeturat.

znj. Ardita Rrahmani: Referuar raportit të auditorit të brendshëm, shihet se të rekomandimet kemi një përqindje është 3.74% me të madhe nga viti i kaluar dhe nuk jemi të kënaqur me 34.78 % në zbatimin e rekomandimeve, ndërkaq kërkoj nga kryetari i komunës në bashkëpunim me ekzekutivin të rritë efikasitetin në zbatimin e rekomandimeve të dhëna nga auditori i brendshëm.

Kryesuesi i Kuvendit: Diskutime të tjera nuk ka, konstatoj se Kuvendi i Komunës

NJOFTOHET

Me Raportin vjetor lidhur me auditimet e brendshme të kryera dhe aktivitetet e Auditimit të Brendshëm për vitin 2022 / Lënda: 01Nr. 470/03-3974/23.

8. Propozim Vendimi për subvencionim të fermerëve;

Kryesuesi i Kuvendit: Drejtori është këtu, E hapi diskutimin: Për diskutim nuk u paraqit kush, atëherë e shtroj në votim këtë pikë dhe e njëjta u aprovua njëzëri. Prezentë 26. Në sajë të kësaj del konstatimi se Kuvendi i Komunës mori

VENDIM

Për subvencionim e fermerëve/ Lënda: 01Nr. 08-320/01-388/23.

9. Propozim Vendim për subvencionim të OJQ-ve në fushën e Kulturës, Rinisë dhe Sportit;

Kryesuesi i Kuvendit: E hapi diskutimin:

z. Agim Mani: Shuma e cila është kalkuluar për subvencione në DKRS është afër 70,000€. A është miratuar me buxhet të vitit 2023 kjo shumë buxhetore. Nëse është marrë njëherë një vendim, atëherë cila është arsyeja me u marrë përsëri vendim për ndarje të subvencioneve ?

Kryesuesi i Kuvendit: Me buxhetin e vitit 2023 janë paraparë subvencionet, është miratuar me buxhet shuma totale për subvencione, në këtë rast propozimet dalin në KK për shpërndarjen e shumës së subvencioneve. Shpërndarja bëhet në bazë të rregullores për subvencione, ndërkaq OJQ duhet të konkurrojnë me projekte, se nuk dihet se cilat OJQ aplikojnë dhe me çfarë projektsh. Vlerësimi bëhet nga ana e komisioneve për OJQ që kanë aplikuar, dhe vijnë përsëri në KK për miratim. Kjo është procedurë që duhet ndjekur, se nuk mundet drejtoria me subvencionuar fjala vjen turneun e Shahut, pa e ditur a po mbahet turneu. Ky është një hap paraprak për me u ndarë këto mjete, pastaj drejtoria pas hapjes së thirrjes publike i njofton OJQ për projektet për subvencionim dhe në bazë të konkurrencës dhe mjeteve buxhetore, bëhet subvencionimi i tyre për ata që aplikojnë.

z. Agim Mani: Kërkoj një sqarim, pasi është vendimi paraprak për ndarjen e subvencioneve, në bazë të atij vendimi është dashur me bërë planin, se ne po marrim një vendim tani, pa pasur një plan për ndarjen e subvencioneve. Për hir të OJQ, ne LVV do të përkrahim këtë propozim vendim, se OJQ e meritojnë edhe me tepër.

Kryesuesi i Kuvendit: Kush përfiton nga subvencionet, varet nga konkurruesit dhe mjetet buxhetore, si total buxheti i ndarë për subvencione është të DKRS.

znj. Hafize Sallahi: Ne për këtë çështje kemi debatuar edhe në KPF, ku jemi thirrur në rregulloren 04/2017 të ministrisë, e cila i parasheh kriteret dhe standardet për ndarjen e subvencioneve. Është e vërtetë se shuma është miratuar si total, 70,000 €, por tani i ke të ndara për kulturë, rini dhe sport. Ne nuk mundemi me bërë plan të detajuar, se nuk e dimë OJQ me çfarë projektsh do të aplikojnë. Ne e kemi planin e punës së drejtorisë në kuadër të planit të ekzekutivit. Formohet një komision prej 5 anëtarëve i cili iu jep përparësi OJQ në bazë të projektit të cilin e dërgojnë, ndërkaq do të jetë edhe një komision tjetër i cili e monitoron ndarjen e subvencioneve, d.m.th gjithçka do të jetë shumë transparente në ndarjen e subvencioneve.

znj. Ardita Rrahmani: Thirrjet publike të cilat dalin nga DKRS, e ndiej për obligim ndaj vetës e në veçanti ndaj qytetarëve t'i bëjë thirrje-DKRS që t'i subvencionoj me tepër ato OJQ të cilat i sjellin rezultate me të mira komunës tonë.

z. Agim Çaka: Të pika 1.1 thuhet, lejohet shuma 19,500€ për mbështetje të OJQ në fushën e kulturës, ndërkaq të pika 1.3 i pikës 1. thuhet lejohet shuma 6,000 € në fushën e kulturës, rinisë dhe sportit. Të pika 1.3 fusha është me e gjerë, ndërkaq shuma e mjeteve është e vogël për subvencione.

z. Agim Mani: Drejtoresha e përmendi një rregullore të ministrisë 04/2017, unë e kam lexuar atë rregullore, rregullorja thotë se duhet të jetë një plan transparentë.

Kryesuesi i Kuvendit: Plani transparentë është që drejtoria e ka ndarë shumën e mjeteve, me shumën e caktuar, 19.500€ të kultura, 44.500€ të rinia dhe sporti dhe 6.000€ të kultura, rinia dhe sporti. Plani transparentë bëhet edhe kur të ndahen këto shuma të mjeteve OJQ, të njëjtat do të vijnë në KK dhe do të bëhen transparente në faqen zyrtare të komunës. Komuna duhet të shikuar që secili subvencion që ndahet, a po shpenzohet për destinimin e caktuar, ku secila OJQ duhet të raportoj tek organet kompetente për shumën e mjeteve të shpenzuara nga subvencionet.

znj. Hafize Sallahi: Të shuma 6,000€ janë për subvencionim të aktiviteteve të paplanifikuara gjatë vitit. DKRS ka planin e punës për aktivitetet të cilat do t'i zhvilloj, por në ndërkohë mund të dal ndonjë kërkesë për ndonjë aktivitet nga ndonjë OJQ për e cila është e mirëseardhur për komunën. Këto bëhen me thirrje publike, ne nuk i dimë fushat ku do të jetë ndonjë kërkesë për aktivitete, për atë arsye është paraparë kjo shumë për ndonjë aktivitet i cili nuk është realizuar me parë, si p.sh. vjet e kishim një aktivitet për ditën e të moshuarve, e cila është mbajtur për herë të parë në Kaçanik, të cilat mjete janë ndarë me shpallje publike.

z. Agim Çaka: Të pika 1. 1 e vendimit, për rini e sport nuk ka të paraparë mjeteve, vetëm për kulturë, ndërsa të pika 1. 3 janë 6,000€ për kulturë rini dhe sport.

znj. Hafize Sallahi: Të këto 6,000€ kanë të drejtë aplikimi për ndonjë aktivitet të paplanifikuar që do të mbahet, ndërsa të shuma 19,500€, sivjet është një rritje se vjet janë ndarë 18,500€. Këtu hynë edhe organizimi 3 ditor i festivalit të fëmijëve dhe festivali tradicional që mbahet për nder të ditës së Çlirimit të Kaçanikut, ku aplikojnë SHKA -3 prej të cilave i kemi këtu, ndërkaq 44,500€ është për sport. Vjet i kishim 14 klube sportive që kanë aplikuar për këtë shumë, sivjet ka rritje, se janë formuar edhe klube tjera. Këto mjete nuk janë të mjaftueshme, por do të mundohemi me iu ndihmuar klubeve të cilat zhvillojnë aktivitete sportive.

z. Rustem Zenuni: Në raportin e DKRS mund t'i shohim se si janë ndarë subvencionet e kësaj drejtorie OJQ-ve.

z. Adnan Reka: Raporti financiar nga tregon për mjetet që janë shpenzuar, ndërkaq ne po duam me ditur si janë shpenzuar mjetet, ku kanë shkuar, se ne këtu nuk kemi asnjë plan se ku kanë me shkuar këto mjete.

Kryesuesi i Kuvendit: Në bazë të thirrjeve publike, shpenzohen mjetet, se përndryshe nuk e dimë as ne se ku kanë me shkuar këto mjete.

znj. Hafize Sallahi: Për me tepër, OJQ që do të përfitojnë, do të jenë të publikuara në faqen zyrtare të komunës, pas zhvillimit të procedurës së rregullt të ndarjes së tyre.

Kryesuesi i Kuvendit: Diskutime të tjera nuk ka, atëherë e shtroj në votim për aprovim këtë pikë. Rezultati i votimit, me 25 votë për, Kundër votë nuk pati, Abstenoj Raif Kasa. Prezentë 26. Në sajë të kësaj del konstatimi se Kuvendi i Komunës mori këtë:

VENDIM

Për subvencionim të OJQ-ve në fushën e Kulturës, Rinisë dhe Sportit/Lënda: 01Nr. 09-660/01-4005/23.

Kryesuesi i Kuvendit: E konstatoj mbledhjen të përfunduar në ora 13:37. Deri në fund të mbledhjes qëndruan 26 anëtarë, ndërkaq me lejen e Kryesuesit të KK, Besnik Salihu shkoj gjatë shqyrtimit të pikës së tretë.

Procesmbajtëse
Makfire Malsiu

Makfire Malsiu



Kryesues i Kuvendit
Kemal Murseli

Kemal Murseli

REGJISTËR I ANTARËVE TË KUVENDIT TË KOMUNËS
(të zgjedhur në votimet e datës 17 Tetorit 2021);

Nga Mbledhja e II (dytë) e Rregullt e Kuvendit të Komunës për vitin 2023, mbajtur me 27.02.2023 :

1. Kemal Murseli,
2. Brahim Imishti.....,
3. Hamide Luma,
4. Kadri Krivenjeva,
5. Fitore Vishi,.....,
6. Rustem Zenuni,.....,
7. Edon Baftiu,
8. Selajdin Troni,
9. Fatmir Bunjaku,
10. Bashkim Krasniqi,
11. Florina Lika-Vishi,
12. Lejla Muhaxheri-Çaka.....,
13. Agim Mani,
14. Kadrije Lika-Troni,
15. Adnan Reka,
16. Naim Beça,
17. Raif Kasa,
18. Ernesta Krasniqi,.....,
19. Bashkim Luma,
20. Arta Avdiu,
21. Ardita Rrahmani,
22. Besnik Salihu,
23. Betim Shala,.....,
24. Arlinda Rakoci-Raka.....,
25. Rabije Sallahi.....,
26. Ekrem Livoreka.....,
27. Agim Çaka......



Republika e Kosovës
Republika Kosova
Republic of Kosovo
Kaçanik



Komuna e Kaçanikut
Opština Kaçanik
Municipality of

Zyra e Kryetarit

Kaçanik, 29.03.2023.

Për: Anëtarët e Kuvendit/ z. Betim Shala
z. Agim Çaka
znj. Kadrije Lika-Troni
znj. Ardita Rrahmani

Lënda: PËRGJIGJE

Të nderuar,

Më lejoni t'ju përgjigjem dhe të jap sqarime zyrtare lidhur me pyetjet/kërkesat tuaja, të parashtruar para Kuvendit të Komunës, më datë, 27.02.2023

z. Betim Shala

I nderuar, Pasi kemi marr zhgjidhjen teknike nga Infrakosi dhe duke parë nevojën urgjente për ndërtimin e nënkalimit për këmbësor kemi siguruar mjetet nga buxheti komunal në vlerë prej 241000€ për ndërtimin e nënkalimit për këmbësor mes stacionit të trenit dhe ETC-së.

z. Agim Çaka

I nderuar

Bazuar në kërkesën për sqarime mbi ecurin e Aktivitetit të prokurimit për Projektin "Rregullimi dhe asfaltimi i rrugës që lidhë vendbanimet Gërlicë- Kaçanik i vjetër- Stagovë-Runjevë, segmenti Stagovë - Runjevë " - me nr. të Prokurimit KA652/22/065/521 ju njoftojmë:

Me dt. 24.06.2022 është publikuar Njoftimi për Kontratë dhe Dosja e Tenderit për këtë Projekt.

Me dt. 15.07.2022 janë pranuar Ofertat të 4 Operatoreve ekonomik përmes platformës elektronike e-prokurimi prej të cilave Oferta me çmim më të lirë ka qënë "Eurotrans" shpk me çmim prej 245,800.95€ dhe Oferta me çmim më të lartë ka qënë OE "Bujar Shabani" B.I nga Ferizaj me çmim prej 273,667.75€ (OE "Sallahu" shpk ka ofertuar me çmim prej 389,537.50€ respektivisht me të lartë se vlera e parshikuar dhe e njejtë nuk është marrë për bazë bazuar në LPP në fuqi).

Me dt. 18.07.2022 është Formuar komisioni i Vlersimit dhe ka rekomanduar për kontratë OE "Eurotrans" shpk me çmim prej 245,800.95€.

Me dt. 27.07.2022 OE "Bujar Shabani" B.I nga Ferizaj ka bërë kërkesë për Rishqyrtim dhe lënda është kthyer në Rivlersim dhe komisioni ka rekomanduar të njejtën OE "Eurotrans" shpk me çmim prej 245,800.95€.

Me dt. 01.08.2022 Autoriteti kontraktues ka prurë Vendimin për OE "Bujar Shabani" B.I dhe është Refuzuar kërkesa e tij.

Me dt. 26.08.2022 OE "Bujar Shabani" B.I nga Ferizaji ka bere Ankesë në OSHP kunder Vendimit të AK-së.

OSHP ka pri Vendimin me dt. 21.10.2022 ku ka aprovu Kerkesen e OE "Bujar Shabani" B.I nga Ferizaji dhe ka kerku Ri vlersimin e tenderit.

Bazuar në Vendimin e OSHP-se eshte Rekomandu OE "Bujar Shabani" B.I nga Ferizaji Dhe janë njoftu Operoret ekonomik lidhur me Vendimin e AK-se.

Me dt. 07.11.2022 OE "Lunari Company" shpk me seli Komogllavë dhe "Eurotrans" shpk kanë bere kerkesë për Ri Vlersim.

Me Vednimin e AK janë Refduzu kerkesat per Rivlersimt të OE "Lunari Company" shpk me seli Komogllavë dhe "Eurotrans" shpk.

Me dt. 28.11.2022 OE OE "Lunari Company" shpk ka bere Ankes ne OSHP.

Me dt. 30.12.2022 OSHP ka pru Vendimin dhe ka Rekomandu që Vendimi I AK te mbetet në fuqi.

Bazuar ne Rekomnadinin e ZKF-se AK me dt. 01.02.2023 ka marrë Vendim anulimin e ketij Aktivitetit te Prokurimit.

Me dt. 24.02.2023 OE "Bujar Shabani" B.I nga Ferizaji ka bere kerkesë në OSHP dhe lenda eshte ne procedurë.

znj. KadrijeLika-Troni


E nderuar, Lidhur me punësimin e personave me aftësi të kufizuara në administratën komunale i plotësojmë kushtet e parapara me ligj ngase kemi të punësuar 3 persona ndërsa administrata i ka 133 punëtor.

Znj. Ardita Rrahmani

E nderuar, sa i përket pyetjes tuaj lidhur me grantin e performancës përgjigjia është si vijon:

Meqenëse për të qenë pjesë e garës duhet te plotesohen 3 kritere, ku një nga këta është edhe opinionin i auditorit të jashtëm dhe meqenëse opinionin i auditorit ka qenë i modifikuar në bazë të gjeturave të tyre ne si Komunë nuk kemi qenë pjesë e garës së performancës.

Kryetari i Komunës
Besim Ilazi





Republika e Kosovës

Republika Kosova
Republic of Kosovo



Komuna e Kaçanikut

Opština Kaçanik
Municipality of Kaçanik

Nga: Drejtoria e Urbanizmit, Kadastrit dhe mbrojtjes së Mjedisit

Për: Z. Agim Çaka, Këshilltar i Kuvendit të Komunës Kaçanik

Pyetja e z. Agim Çaka:

2. Te projekti I ndertimit te hekurudhes, ka ankesa te qytetareve, sepse gjate punimit te hekurudhes eshte ngushtuar rruga, me çka eshte veshtiresuar kalimi me makina. Jane vendosur disa mbrojtese betony, te cilat mendoj se jane jashte standardeve te mbrojtjes se rrugeve dhe te kembesoreve, qe kalojne atypari. Makinat duke ia leshuar rrugen njera tjetres, ka rrezik me perfundiu ne hekurudhe. A do te kete mbikalime apo nenkalime ne dy pozicione te hekurudhes, te Kalaja dhe te pjesa e rruges qe vazhdon per te shkolla.

Përgjegje nga DUKMM, Drejtori Qamil Stagova:

Ju njoftojmë se ne baze te kontakteve qe i kemi me zyrtare te Infrakos-it, sa i përke dëmeve qe janë shkatuar nëper rruge kanalizime na është thene qe te gjitha demet do te sanohen. Ne te vertete nuk kemi diçka te veçante me shkrim, prej tyre. Ne e kemi dërgua nje e-mail per Infrakos-in, por deri me tash nuk kemi marre ndonjë përgjigje.

Sa i përket nënkalimeve, ju njoftojmë se është në procedure te përgatitjes se variantes perfundimtare te projektit Ndertimi i nenkalimit ne Kaçanik. Nenkalimi do te ndërtohet ne hapsiren ne mes te Stacionit hekurudhor te Kaçanikut dhe objektit te ETC-se. Per kete qellim kemi marre edhe kushtet teknike per specifikat e ndertimit te nënkalimit, pre zyrtareve përkatës te Infrakos-it.

Ju njoftojmë se Drejtoria e Urbanizmit i ka paraqite Infrakos-it disa kërkesa pe ndertimin e nënkalimeve:

- Takime te ndryshme me zyrtaret e Infrakos-it, ku eshte kerkuar ndertimi nenkalimeve;
- Me 04.11.2022 kerkesa e DUKMM-se per ndertimin e dy nenkalimeve;
- Poashtu me kerkese per ndertimin e nenkalimeve i jemi paraqite edhe MMPHI se, me 20.12.2022;
- Per kete qellim jemi takuar me zëvenësministrin e MMPHI-se z. Hysen Durmish ne Prishtine;
- Pas kesaj kemi pase nje takim me z. Hysen Durmishi ne zyrat e Komunes tone e pastaj kemi dale edhe ne vendin ku ne kemi planifikuar ndertimin e nenkalimit ku ishte i pranishem edhe Kryeshefi i Infrakos-it, z. Naser Krasniqi.

Perfundimisht e kemi kuptuar se ndertimi i vendkalimit nen linjen hekurudhore munt te behet vetem me investimin e Komunes.

- Sipas marreveshjes prej ketyre takimeve, me 22.02.2023 i jemi paraqite Infrakos it me kerkese per caktimin e kushteve teknike per ndertimin e nenkalimit.

Kushtet teknike i kemi marre dhe tash jemi ne fazen e përgatitjes se variante: perfundimtare te projektit.



Republika e Kosovës

Republika Kosova
Republic of Kosovo



Komuna e Kaçanikut

Opština Kaçanik
Municipality of Kaçanik

Nga: Drejtoria e Urbanizmit, Kadastrit dhe mbrojtjes së Mjedisit

Për: Z. Betim Shala, Këshilltar i Kuvendit të Komunës Kaçanik

Pyetja e z. Betim Shala:

2. Pyetje per Kryetarin e Komunes: A ka diçka lidhur me nenkalimin prej rruges "Skenderbeu" deri te ETC, te pjesa ku kalojne femijet me shku ne shkolle.

Përgjegje nga DUKMM, Drejtori Qamil Stagova:

Ju njoftojmë se eshte ne procedure te përgatitjes se variantes perfundimtare te projektit Ndertimi i nenkalimit ne Kaçanik. Nenkalimi do te ndërtohet ne hapsiren ne mes te Stacionit hekurudhor te Kaçanikut dhe objektit te ETC-se. Per kete qellim kemi marre edhe kushtet teknike per specifikat e ndërtimit te nënkalimit, prej zyrtareve përkatës te Infrakos it.

Ju njoftojmë se Drejtoria e Urbanizmit i ka paraqite Infrakos-it disa kërkesa pe ndërtimin e nënkalimeve:

- Takime te ndryshme me zyrtaret e Infrakos-it, ku eshte kerkuar ndertimi nenkalimeve;
- Me 04.11.2022 kerkesa e DUKMM-se per ndertimin e dy nenkalimeve;
- Poashtu me kerkese per ndertimin e nenkalimeve i jemi paraqite edhe MMPHI se, me 20.12.2022;
- Per kete qellim jemi takuar me zëvenësministrin e MMPHI-se z. Hysen Durmish ne Prishtine;
- Pas kesaj kemi pase nje takim me z. Hysen Durmishi ne zyrat e Komunes tone e pastaj kemi dale edhe ne vendin ku ne kemi planifikuar ndertimin e nenkalimit ku ishte i pranishem edhe Kryeshefi i Infrakos-it, z. Naser Krasniqi.

Perfundimisht e kemi kuptuar se ndertimi i vendkalimit nen linjen hekurudhore munde te behet vetem me investimin e Komunes.

- Sipas marreveshjes prej ketyre takimeve, me 22.02.2023 i jemi paraqite Infrakos it me kerkese per caktimin e kushteve teknike per ndertimin e nenkalimit.

Kushtet teknike i kemi marre dhe tash jemi ne fazen e pergatitjes se variante: perfundimtare te projektit.

Ju njoftojme se kemi pase edhe kerkesa te tjera drejtuar Infrakos-it dhe qeverise edhe per probleme te tjera qe jane paraqite gjate kryerjes se punëve për rehabilitimin e Linjës Hekurudhore Fushe Kosove – Hani Elezit.

Drejtori i DUKMM-së, Qamil Stagova



Republika e Kosovës

Republika Kosova
Republic of Kosovo



Komuna e Kaçanikut

Opština Kaçanik
Municipality of Kaçanik

Nga: Drejtoria e Urbanizmit, Kadastrit dhe mbrojtjes së Mjedisit

Për: Z. Betim Shala, Këshilltar i Kuvendit të Komunës Kaçanik

Pyetja e z.Betim Shala:

E kam një pyetje për ekzekutivin e komunes. Se pari pajtohem me diskutimin e z. Agim Mani për punimet e hekurudhës në Fshatin Stagovë. Te pjesa e zonës së parë të qytetit, e di se është me tepër në përgjegjësi të Ministrisë së Infrastruktura, por sipas Ligjit për Vetëqeverisje lokale, komuna ka disa kompetenca. Me intereson, a kanë marrë atë ministri ndonjë pëlqim në Komune? A ka mundësi me ditë sa është plani dinamik I kryerjes së punimeve, se aty femijet kalojnë përmes një terrace për të shkuar në Shkollën e Vjetër "Emin Duraku"? A ka Komuna ndonjë informate se mos ka me u bërë aty terminal, për shkarkimin e trenave? Sipas PZHK-së aktuale dhe të riun, nuk e di se aty është parapa me u shkarku trenatqysh kanë shkuar punët dhe a ka komuna njohuri për këtë.

Përgjigje nga DUKMM, Drejtori Qamil Stagova:

Ju njoftojmë se Ministria e Mjedisit Planifikim Hapsinor dhe Infrastruktura (MMPHI) nuk kanë pëlqim në lidhje me punët që janë duke u kryer për rehabilitimin e linjës hekurudhore Fushe Kosove – Hani Elezit. Nuk kemi ndonjë informate mbi planin dinamik të kryerjes së punimeve. Nga takimet na është thënë se terraca që e përmendni ju është platforma e udhëtarëve të Stacionit të Kaçanikut..

Drejtori i DUKMM-së, Qamil Stagova



Republika e Kosovës
Republika Kosova
Republic of Kosovo



Komuna Kaçanik
Opština Kaçanik
Municipal of Kaçanik

Kaçanik 27.03.2023

Drejtoria e Shëndetësisë dhe Mirëqenies Sociale

Pergjigje në pyetjet dhe kërkesat e anëtarëve të Kuvendit të komunës

Naim Beqa Pyetje e dytë është për drejtorin e DSHMS: Ku është arsyeja që vetëm deri në ora 15:00 veturat parkohen në parkingun e ambulancës, ndërkaq me ka rastisur me i parë vetura që vijnë nga terreni pas orës 15:00 ndalen me larg nga ambulanca, paguajnë parking me para, shpesh edhe dënohen në mungesë parkingu. Këtë nuk e kuptoj, kur dihet se ambulanca punon deri në ora 20:00, ndërkaq parkingu mbyllet në ora 15:00.

Përgjigje: Arsyet e mbylljes së parkingut brenda oborrit të QKMF-së:

1. Bllokimi i rrugës për veturat e QKMF-së dhe stafit shendetesor
2. Siguria ,demtimi i automjeteve te QKMF-së
- 3.Problemet e theksuara në të kaluaren kur kemi pasur raste që personat e caktuar kan parkuar veturën në oborrin e QKMF-se dhe kanë dalur për kafe e jo sherbim në QKMF.
- 5.Komuna e Kaçanikut ka lejuar per pacientët 10 parkingje falas per nevojat e pacientëve, ku prej tyre 2 parkingje janë për personat me aftësi të kufizuara.

Drejtori i DSHMS-së
Sali Malsiu



Republika e Kosovës
Republika Kosova
Republic of Kosovo



Komuna e Kaçanikut
Opština Kaçanik
Municipality of Kaçanik

Drejtoria e Shërbimeve Publike dhe Emergjencave

Kaçanik, 29.03.2023

Për: Anëtarët e Kuvendit/ **z. Naim Beça**
znj. Kadrije Lika-Troni
z. Agim Çaka
z. Ekrem Livoreka

Lënda: PËRGJIGJE

Të nderuar,

Më lejoni t'ju përgjigjem dhe të jap sqarime zyrtare lidhur me pyetjet/kërkesat tuaja, të parashtruar para Kuvendit të Komunës, më datë, **27.02.2023**, të cilat ndërlidhen me detyrat dhe përgjegjësitë e Drejtorisë së Shërbimeve Publike dhe Emergjencave.

z. Naim Beça: Kërkoj nga organet përkatëse komunale të vendosë mbrojtëse për vetura në rrugë të rrezikshme, që mos të ndodhë aksident me fatalitet. Në vazhdim z. Beça i potencoj aksidentet e ndodhura kohëve të fundit në rrugë të rrezikshme (Llanishtë) me të lënduar të 3-4 persona, në mesin e të cilëve edhe një familjar.

- Drejtoria e Shërbimeve Publike dhe Emergjencave është në pritje të lidhjes së kontratës "Rregullimi dhe mirëmbajtja e sinalizimit horizontal dhe vertikal"-kontratë e planifikuar për periudhën 3 vjeçare, ku kemi pozicione të parapara për vendosjen e pahive elastike (mbrojtësve). Me lidhjen e kontratës do të fillojmë me vendosjen e tyre në lokacionet me rrezikshmëri që janë evidentuar nga zyrtarët e drejtorisë dhe inspektori i komunikacionit.*

znj. Kadrije Lika-Troni :

E kam një pyetje për drejtorin e DSHPE: Mungesa e ngadalësuesve të shpejtësisë në afërsi të shkollave, mungesa e sinjalizuesve horizontal dhe vertikal në afërsi të shkollave, trotuari i shndërruar në formë parkingu dhe dalja direkt në rrugë e nxënësve nga shkolla të SHF "Emin Duraku" në Kaçanik, cenon lirinë dhe sigurinë e fëmijëve dhe kjo mbetet ende problem në komunën tonë. Nëse mundesh drejtor me na shpjeguar: A janë të pajisura të gjitha rrugët në afërsi të shkollave me sinjalizues ?

- Shumica e shkollave fillore dhe të mesme, të cilat kanë dalje direkte në rrugë publike, kanë të punuara ngadalësuesit apo zebra për këmbësorë të ngritura nga niveli i rrugës. Në hyrje të SHFMU "Emin Duraku"-Kaçanik, pasi janë përfunduar punimet në asfaltimin e rrugës "Sali Bajra", me kontratën për mirëmbajtjen verore të rrugëve locale do të punohet ngadalësuesi i shpejtësisë me shtresë asfalti dhe sapo të bëhet lidhja e kontratës "Rregullimi dhe mirëmbajtja e sinalizimit horizontal dhe vertikal", do të shënohet vendkalimi për këmbësorë dhe vendosja e shenjave vertikale..*

z. Agim Çaka: Në këtë mbledhje do t'i paraqes disa çështje të cilat janë në interes të qytetarëve:

1. Ndriçimi publik, nuk është funksional në pjesën me të madhe të qytetit, me saktësisht, të Kalaja, të Ura e Konakut dhe një pjesë të rrugës së Rakocit deri të lagjja Lika.

- *Drejtoria e Shërbimeve Publike dhe Emergjencave është në pritje të lidhjes së kontratës "Mirëmbajtja e ndriçimit publik" e cila është me ankesë në OSHP. Me lidhjen e kontratës do të fillojmë sanimin e defekteve që janë paraqitur në rrjete të ndryshme të ndriçimit publik të shtrira përgjatë rrugëve lokale dhe lokacione tjera publike.*

2. Të projekti i ndërtimit të hekurudhës, ka ankesa të qytetarëve, sepse gjatë punimit të hekurudhës është ngushtuar rruga, me çka është vështirësuar kalimi me makina. Janë vendosur disa mbrojtëse të betonit të cilat mendoj se janë jashtë standardeve të mbrojtjes së rrugës dhe të këmbësorëve që kalojnë atypari. Makinat duke ia lëshuar rrugën njëra tjetrën, ka rrezik me përfunduar në hekurudhë. A do të ketë mbikalime apo nënkalime në dy pozicione të hekurudhës, të Kalaja dhe të pjesa e rrugës që vazhdon për të shkolla?

- *Demolimi i asfaltit dhe ngushtimi i rrugës "Ismajl Raka" përgjatë trasesë së hekurudhës është bërë përkohësisht deri në punimin e murit mbrojtës. Më pas do të sanohet pjesa e prerë e asfaltit për punimin e shputës së murit dhe gjërësia e rrugës do të jetë afërsisht e njëjtë me gjendjen e mëhershme.*
- *Mbikalime apo nënkalime në këto dy lokacione nuk janë të parapara në projektin e rehabilitimit të hekurudhës por do të vendosen vetëm laurat mbrojtëse sinjalizuese, kurse komuna e Kaçanikut ka planifikuar ndërtimin e një nënkalimi për këmbësor afër ETC-së që do të lidhet me rrugën "Skenderbeu".*

z. Ekrem Livoreka: Kam një kërkesë për DSHPE, Ramadush Osmani: Me kërkesë të banorëve të fshatrave; Gajre-Ivajë-Strazhë, në hyrje të rrugës, Gajre, kërkoj të vendoset një shenjë orientuese me emrat e fshatrave, për me bërë orientimin e qytetarëve me të lehtë në atë pjesë.

- *Drejtoria e Shërbimeve Publike është në pritje të lidhjes së kontratës "Rregullimi dhe mirëmbajtja e sinalizimit horizontal dhe vertikal" ku kemi pozicione të parapara për vendosjen e shenjave vertikale të trafikut dhe shenjave me emërtim të lokaliteteve. Me lidhjen e kontratës do të fillojmë me vendosjen e tyre në lokacionet ku janë evidentuar nga zyrtarët e drejtorisë dhe inspektori i komunikacionit.*

Ju falenderojmë për bashkëpunimin tuaj!

Me respekt,

